



partii naleraq

UKA 2016/007-02

15-11-2016

2017-mut aningaasanut inatsisissatut siunnersuutip aappassaanneerpeqarnera.

Aallaqqaasiullugu Partii Naleqqamiit nuannaarutingaarput qilanaaralugulu naalakkersuisooqatigiilernermit isumaqatigiisummi maannakkut atuutilersumi, inuit ilaqutariillu pissakinnerit akunnattumillu isertitaqartartut kiisami ulluinnarni atugarissaarnerulaalernissaannut periarfissat pitsaanerulersinneqarnissaat aqutissiuunneqartussanngormata. Tamatumanilu Partii Naleqqamiit sapinngisarput tamaat suleqataassagatta qularutigineqassanngilaq.

Taamaattumik matumuuna sakkortuumik kaammattuutigissuarput, utoqqarnut siusinaartumillu sulisinnaajunnaarnersiutilinnut atugassarititaasut pimoorullugit aaqqiivigineqarnissaat aningaasanut inatsisissatut siunnersuutip pingajussaanneerpeqarnissaanut malunnaatilimmik aaqqiissutissamik saqqummiussisoqassasoq.

Tassami maannamut suliap aappassaanneerpeqarnerani takusinnaangatsigu utoqqartatsinnut siusinaartumillu sulisinnaajunnaarnersiutilinnut, utoqqalinersiutit siusinaartumillu sulisinnaajunnaarnersiutit aappaasup isertai apeqqutaatillugit naatsorsorneqartassasut, naak siornali taakku neriorsorneqaraluartut utoqqalinersiat siusinaartumillu sulisinnaajunnaarnersiutit aappaasup isertitai apeqqutaatinnagit tunniunneqartalissasut.

Tassami aamma tungaviumik utoqqalinersiat annertussusaat maanna siunnersuutigineqartoq naapertorlugi aappaasup isertitaanut sunniuteqartussaannngitsut taamaallaat ukiumut 60.350 kr-put, tassa qaammammut skat-i peernagu 5.000 kr-t sinnilaarlugit, taakkulu inuup kialluunniit qaammat tamaat inuussutigisinnaanngikai tamatta nalunngilarput.

Taamaattumik naalackersuisooqatigiilernitsinni ilaqutariinnut pissakinnerusunut akunnattumillu isertitalinnut aamma malunnaatilimmik oqilisaassinissarput pisariaqarluinnartoq Partii Naleqqamiit eqqaasitsissutingaarput.

Tassami ilaqutariit pissakinnerit akunnattumillu isertatillit inuuniarnikkut, minnerunngitsumillu ineqarniarnikkut angummanniapiloortut amerlaqaat, ilami allaat ilaqutariippassuit inigisaminniit anisitaanikuupput

Ilaqutariit inigisaminniit anisitaasartut amerlingaluttuinnaraluartut, minnerunngitsumillu siusinaartumik sulisinnajunnaarnersiutillit tigusartakkaminnik pīiaaffigineqarnerminnik aasaq manna naammagittaalliorluaqisut, siunnersuummi uani konto 20.05.20-mi ilaatigut imannak allaqqasoqarpoq:

"2015-imi ineqarnermut tapiissutit aningaasartuutit missingersuusiorneqartuniit appasinnerunerisa kingunerisaanik 2017-imi ataatsimoortumik tapiissutit 2,5 mio. Kr.-inik ikilisinneqassapput. 2015-imi siusinaartumik pensionisianut aningaasartuutit missingersuusiorneqartunit malunnartumik appasinnerunerisa kingunerisaannik 2017-imi ataatsimoortumik tapiissutit 15,5 mio kr.- inik ikilisinneqassapput".

Taamaamat Naalackersuisusunut inussiarnersumik kaammattuutigissuarput, ilaqutariinnut pissakinnerusunut aningaasat immikkoortinneqarsimangaluartut sipaarniutitut inissiinnarnagit minnerpaanguakkulluunniit ilaqutariinnut pissakinnerusunut ineqarnikkut oqilisaassutissatut atorneqarnissaat sulissutigeqqullugu.

Inissianik isaterinerit inissialiortiternerillu sukumiinerusumik pilersaaruserfigineqarnissaat pisariaqarpoq, minnerunngitsumik suliffeqarfiit mikinerusut maani nunaqavissunik suliffisaqartitsillutillu aamma ilinniartuutillit salliutinneqarnissaat qulakkeersimaqqullugu.

Inissiaatileqatigiiffinnik ineqartut akilersinnaangisaannik akisoorujussuarmik ingerlatsinerit nalilersoqqinneqarnissaat Partii Naleqqamiit piumasagaatingaarput. Ineqartut inigisaminnik nammineerlutik piginnittunngorsinnaanerit inatsisitigut eqaannerusumik aqqissuunneqarnissaa eqqarsaatigeqqinneqartariaqartoq isumaqarpugut.

Sanaartugassanut iluarsagassanullu aningaasaateqarfimmi 2015-ip naanerani aningaasat atorpeqanngitsut 1 mia sinneqalaartut maannamut qanoq amerlatigilersimanersut paasissallugu soqutingaarput, tassami sanaartornermik suliallit sumiiffiit ilaanni suliassaaleqipput.

Taamaattumik uani siunnersuummi illoqarfiit ilaannaasa kisimik pilersaarusionerfigineqarsimanerat naammangilaq.

Nuummi inunnut ilaqutariinnullu ineqarnikkut ajornartorsiuteqartunut inissiaq ukiut marluk matuma siorna naammassineqartoq, sulili maannamut atorpeqarani uninngatiinnarneqartoq kiisami siunertamut atorpeqartussanngormat nuannaarutingaarput, Kommuneqarfik Sermersuumullu tunineqarnissaa taperserlugu.

Nunatta kujataani diskobugtimilu ilaasunik Angallassinissamut Kiffartuussinissamik isumaqatigiissummut torrallataannngilluinnartumut aaqqiissuteqarnissaq inuiaqatigiinnut, minnerunngitsumillu atuisussanut pitsaanerpaamik aaqqiissuteqarnissaq anguniarlugu atuisut peqataatillugit sulisoqassasoq kaammaattuutingaarput.

Tassami nassuerutigisariaqarpoq nunatta kujataani, diskobugtimilu ilaasunik angallassinissamut isumaqatigiissut paasisinnaasavut naapertorlugit suliarilluangaasimanngitsoq amingaateqaraluaqisorlu isumaqatigiissut tamakkiisuunngeqisoq naammassineqanngitsorlu atsiorneqarsimammat.

Aalisakkat raajallu akigissaarnerisa kingunerisaannik akileraarutitigut isertitat amerleriarnerat isumalluarfingaarput, 2017-mullu isertikkumaagassat 10 mio kr.-inik amerleriaateqarnissaannik ilimasunneq taperserparput, kaammattuutigeqqissallugulu ukiumut aalisagartassiissutit tamakkerlugit qaqinneqartarnissaat pimooruteqqullugu.

Aamma avaleraasartooriarnissami pilersaarusionerluarnissaq, minnerunngitsumillu pisassiissutissat amerlanerpaartaasa, ajornanngippallu maani nunatsinni aalisartunit tamaasa pisarineqarnissaat kaammattuutingaarput.

Aallartiteqqinnissamut aningaasaliissuteqaqqittoqartalernissaanik siunnersuuterput isumaqatigiiniarnitsinni Naalakkersuisuniit ilassilluarneqarmat iluaraarput. Aamma

naatsorsuutingaarput aalisartunut siunnersuisarneq KNAPK-mut utertinneqassasoq, taamaalilluni aalisartut qanimut sullinneqartarnerat ingerlateqqinneqarsinnaaqqullugu.

Allannguutissatut siunnersuutit meeqqanut inuusuttuaqqanullu sunniuteqarluartussat aningaasaliissutissat tamakkiisumik taperserpavut, minnerunngitsumik aamma ilaqutariit aningaasarsiakinnerit akunnattumillu isertitallit meerartaasa efterskolertinneqartarnerisa akeerutsinneqarnissaat aamma tamakkiisumik taperserparput.

Naalackersuisunut kaammattuutingaarput, aalisakkanik tunisassiat avammut niuerutigineqartarneranni nunarsuarmi niuerfinnut toqqaannarnerusumik niuertalernissaq pimoorullugu sulissutigineqassasoq.

Aamma siunissami nunatta namminerisaminik aningaaseriveqalernissaa, sillimmasiisarfeqalernissaatalu isumaliutigineqarnissaa Naalackersuisunut kaammattuutingaarput, tassami nunatta avammut niuernerani assigiinngitsutigullu kiffartuunneqarnerani aningaasarparujussuit nunatsinniit aniatinneqartut isiginngitsuusaaginnarneqarnerannut akissaqanngilagut.

Sanaartugassarpasuarnut aningaasassaaleqivugut, taamaammat soqutiginarpoq paasissallugu, nunatta karsiata nunatta avataaniit aningaasanik taarsigassarsinnaanerata killeqarnera suut aaliangersakkat naapertorlugit landskarsip kaaviiartitaasa 75%-iat taamaallaat attartorneqarsinnaanersoq?

Naggataatigut Partii Naleqqamiit akuerinngilarput suliffeqarfiit akileraarutaannik appaaniarnermik isummersorsimaneq.

Naggaterpiaatigut Partii Naleqqamiit piumasaraarput Inatsisartut Allattoqarfiani aningaasartuutit tamarmiusut sukumiisumik nalunaarsorneqassasut kikkunnilluunniit takuneqarsinnaasunngorlugit.

Taama oqaaseqarluta allannguutissatut siunnersuutit amerlanersai isumaqatigalugit taaseqataaffigissavagut.

Anthon Frederiksen